

清詩鐸

下

〔清〕張應昌編

清詩鐸

下冊

中華書局

清詩鐸卷十五

水災海嘯湖翻江溢河決淮決潮災

陶澍淮水溢。汪懋麟河決。見河防門。

湖翻行 康熙庚戌六月十二日

朱鶴齡

太湖西來天目源。七十二溪波濤奔。震蕩有時溢原野。未聞浩瀚迷乾坤。五月稻秧齊插蒔。三旬霖雨水澎湃。方憂漏天移澤國。忽駭狂瀾卷平地。颶風猛發神鬼愁。火龍擲火驅潮頭。漂砂礫石失垠岸。發屋拔樹蟠蛟蚪。聲如列缺鬬霹靂。勢如共工傾不周。乘陵城郭塔欲倒。千廬萬竈均洪流。巨浪翻騰高屋過。大魚潑刺平衢游。更憐人畜死無數。浮轉塞港漂難求。百歲老翁驚歎久。此災邑志從未有。乘船入市何足云。地軸翻天浸星斗。我時惶遽無竄逃。急上高樓守簞數。竟日魚釜無炊烟。澆愁何處沾村酒。變不虛生豈偶然。撫時感事心欲嘔。盛時蠲賑久不聞。長吏敲榜肯停否。欲訴真宰天茫茫。九關虎豹爭獐守。吁嗟蒼生爾奈何。但見號咷走童叟。

濟上水災歎

沈名蓀

濟上淫霖連七日。河漢倒傾江海溢。麥尙存場禾在田。盡付波臣不留一。州官聽事行小舟。州城將備棲城頭。民悲餓死事猶緩。屋壓牆埋只旦晚。白頭老父活一生。未見此災災獨慘。男啼女號聲未

已。州門告示催徵比。

悲淮民

張永銓

悲淮民。淮民大半作波臣。千載神宮巨浸沒。百年祖墓深淵沈。壞我室廬魚游釜。野老策堤勤畚土。腳穿手爛不辭勞。泥水齊腰草沒肚。以車戽水水未出。一夜平添四五尺。乍喜禾苗簇簇青。旋驚波浪皚皚白。嗚呼河伯何不仁。矯首呼天天冥冥。不願俟河清。但願堤無傾。河臣之績勒貞珉。

海嘯行

又

康熙丙子六月朔。陽侯肆橫風濤作。暴雨須臾沒野田。怒潮頃刻盈溝壑。沈沈不止到黃昏。天威慘禍驚難度。滬漻兩邑及崇沙。鄉民半傍海爲家。時過夜半海波嘯。生靈百萬作魚蝦。夫妻子母方宴息。水漲牀前五六尺。起來奔竄已無門。家家盡向洪波沒。最憐瀕死還相親。數口同將繩繫身。猶冀相依或相挈。那知同泛竟同沈。或鑽屋頂求身脫。身隨茅屋偕飄泊。或抱棟梁任所之。風來衝激東西撒。或攀樹杪得暫浮。蛇亦怖死緣樹頭。人怕蛇傷手自釋。人蛇俱已赴滄洲。官軍官馬死無算。牛羊犬豕總無留。黎明雨息風不定。未沒人家歡相慶。遙見波中有一沙。千人沙上呼救命。潮來一捲半云亡。再捲沙沈人已竟。兒童婦女死成團。寸絲不挂浮江干。一日二日面目在。浮尸填積如丘山。三四日皮肉爛。臭聞百里真心酸。五日六日至十日。骨沈水底血成瀾。腎腸半飮江魚腹。肝腦徒供鳥啄殘。半月海塘人裹足。天昏地黑驚心目。子夜時聞怨鬼號。日中還聽游魂哭。嘗考邑乘紀災祥。嘉隆暨萬海波揚。人畜淹沒稱無數。百年未滿復遭殃。嗚呼海民獨何辜。賢愚老幼忽同徂。天吳

海若何殘暴。布此虐令傷太和。我聞異變心悲憐。人命拉朽須臾間。擬把羣尸一埋瘞。探囊羞澀慚無錢。爲疏沿途乞相助。同心無幾徒盤旋。算來尸腐難盛載。隨撈隨地理方全。疏成徒作紙上語。欲行利濟竟無權。嗟哉閭里遭顛連。越瘠秦視人胡然。自古陰陽憑變理。漫將劫數諉蒼天。

大水歎 五首

沈樹本

戊子春徂夏。時若雨暘風。種苗行方徧。鋪田漸芄芄。農夫顧之喜。謂今歲其豐。如何忽遘患。霖雨無終窮。西吳百萬畝。化作黿鼉宮。災殃其數然。詎敢怨蒼穹。所嗟民無食。何以及歲終。作詩維告哀。聲比寒號蟲。

溪水日夜長。莫辨蘆荻洲。橋面撐巨筏。門內維行舟。鄰家有破竈。來往紛游鯈。望中見屋脊。簸蕩如浮漚。下田不可救。沈沒無一留。高田築版牖。全力保甌窰。須臾仍潰決。一概成洪流。誰繪淞洞圖。爲民陳龍樓。帝堯方咨儆。應切懷襄憂。

米船隔江左。米價騰浙西。五斗踰千錢。長飢痛蒸黎。困空突無煙。食盡稅與稊。秋成望更絕。四顧惟荒畦。東家投水死。西家棄其妻。歸來仰屋歎。兒餓牽衣啼。兒慎勿再啼。今夜猶同栖。明當入城市。鬻汝如犬雞。回顧墮血淚。寸腸若刀割。徘徊出門看。曠野愁雲低。

去年旱魃虐。焦卷苗無根。今歲商羊舞。沈浸連千村。水旱適洊至。何策甦元元。吾聞上古時。備患有本原。三年則餘一。倉廩常高屯。縱遇天災至。民力堪自存。救荒於旣荒。所濟何足論。而況併無策。蒿目空憂煩。

吾皇仁如天。湛恩垂渙汗。舊稅與新租。全蠲豈惟半。小民一歲間。縣門踪跡斷。奈何奉行者。天語敢輕玩。公然肆追呼。不顧人焚歎。況此遭凶荒。豈能免逋竄。長歌春陵行。千載思浪漫。元結稱浪叟。亦稱漫叟。有春陵行。

江南潮災歎

恭和聖製

周長發

吳淞巨浸龜鼉國。一夕颶風勢未息。波臣肆虐民罹災。欲障百川手無力。吹沙激浪竟滔天。赤子何辜阨又值。嗚呼一歌兮歌苦辭。民其魚矣疇可咨。

一潮一汐日夕來。孟秋旣望遭奇災。怒蛟排空東澗起。乘龍跋浪重淵迴。民葬魚腹十八九。澤鴻餘亦鳴哀哀。嗚呼二歌兮歌具陳。黎元軫念含酸辛。

清者期河晏期海。詎意沈淪甚癘瘵。九年堯水聞懷襄。此夕天吳驕特最。施賑拯災塵聖憂。稻梁萬舶紛交會。嗚呼三歌兮歌無言。怒濤汨沒悲游魂。

巨浪倒立翻長風。盪瀟落水連天洪。蜺虹噴嗽無雌雄。海鱷飢腹以民充。室廬捲盡如飄蓬。四野絕少半畝宮。嗚呼四歌兮歌幾疊。陰厓尸積如堆葉。

積尸堆葉吁可傷。彼蒼何酷此一方。萬點燐隨黑水滅。千郊月照白骨涼。卽未死者亦啾啾。哀號夜哭桐棺旁。嗚呼五歌兮歌詎闌。誰爲砥柱安狂瀾。

腐齒成丘絕堪憫。縱有慈航苦難引。是時銜命到江南。聞此顛連生不忍。大臣疏奏活無算。何止殘黎救奇窘。嗚呼六歌兮歌不已。聖心饑溺皆由己。

海潮捍禦急無策。惟知上損斯下益。截漕發粟療飢民。仰體天恩在臣職。陽春旋見起凋殘。荒鄉不復悲蕭索。嗚呼七歌兮歌告終。哀此斃獨思無窮。

青溪歎

厲鶚

七月三日天沈沈。海風吹作三日霖。黟山妖蛟最得意。夜拔潭穴漂嶽峯。水來青溪十丈許。鼓怒直使胥濤瘡。胥濤氣短退三舍。人如白蘋蔽江下。屋材家具滿江沒。嗚呼。青溪之人何辜於蒼穹。人人盡在秋夢中。不知魂游龍伯宮。

踏大棚

程穆衡

踏大棚者。崑山民俗桔槔翻水之名也。唯崑西北逼近陽城、巴城諸湖。東接戚浦海潮地窪下者復十九。外堰捍水高於內塘。塘水復高於中田。淫霖潦穰。翻水入塘。勢如捧漏。葦棚蔽日。男婦雜糅。伊軋之聲。沿村瓦里。入夏大雨匝旬。秧穉水盛。疾風不救。閏秋屆冬。民有捐瘠者。詩以哀之。

雲薤山尖山裏帽。憑空雨點天飛瀑。湖波瀾漫海波長。平田秧頂堪游櫂。曳柴負扇拄洪流。農民禦水如禦盜。楸頭船子烏鷗飛。一甌茶熟三通報。鳴鑼鑊集壩間。水聲不敵呼聲鬧。黃昏雲濤雨初停。繞舍謗然聞急譟。百口喧傳壩已坍。叢聒鄰家求一犒。塘外水高三尺強。桔槔翻瀉連村壩。中男小婦裸下裳。脛骸紛拏呼疾蹈。三日纔消一寸餘。髀腫腰酸腳起炮。雨陣當頭潑墨來。苗沈波底兼沈竈。滿望秧鞭嗟大無。惟有鱣鰈可理罩。三冬已過魚負冰。尙見渟潏盈膝叢。

愁霖歎

有前後兩詩。此乃後作。

沈德潛

前年赤地千餘里。去年三吳傷大水。今年霖雨仍不休。波濤滾滾通平疇。魚鼈出沒蛟龍遊。田家有麥刈不得。對此嗷嗷歎無食。

吾家老屋牆垣圯。堂階泥深沒履齒。中宵檐漏鳴奔湍。牀牀屋漏無時乾。風吹燈昏四壁寒。曉聞鄰家壓茅屋。風雨聲中一家哭。

比歲柴荒價無比。況今菜麥淹欲死。百斤三百青銅錢。鄉村日高無爨煙。窮民忍飢伐林木。帶雨擔向豪家鬻。鬻之豪家爛魚肉。

觸目行

夢麟

宿遷桃源土不毛。清河而下皆洪濤。高竇村戶半坍塌。存者牆趾庭生蒿。下河東望浩無際。積潦乃與天爭遙。聞昔少伯堤壩決。埽落不敵天吳驕。湖漲沒河河倒閘。中間弗辨橫堤高。眼見田廬肆衝突。不別貧富齊飄搖。淮陽所屬作藪澤。一任河伯恣貪饕。田禾漂蕩倉廩沒。妻臥竈下夫出逃。洪澤水溢億已甚。黃流況乃乘其凋。前已截漕四十萬。川湖米石來輕舠。皇仁憂惻念蓬戶。廟堂壁畫心焦勞。天災原非力可塞。人事須慰哀鴻曹。仁恩如海民弗及。費而不惠空嗷嗷。豈必官吏肆吞噬。偏全極次分纖毫。我歷徐淮逮高竇。觸目未免中忉忉。敢因所見道余意。作歌聊當陳風謠。

江寧蔡邑侯救圩歌

秦大士

蔡侯治行時少雙。頌聲日日聞此邦。攝篆三月百務舉。士民遠邇咸心降。昨聞父老歌且謠。神君救圩多賢勞。寸忱能格高天高。一手驅將萬頃濤。今年江濤勢莫比。諺語早憂船入市。腴田十萬付波

臣。僅有存者沙洲耳。無何蟻漏潰大堤。奔騰涌出千鯨鯢。滄海倒注大聲發。怒勢直欲無遺黎。萬人竄避棄南畝。覆巢之鳥喪家狗。齊向縣門拜稽首。疾痛會應呼父母。侯聞倉皇出郭視。浮天一望連江汜。野水不通舟楫行。菱盆撐入煙波裏。萬民見侯來。望救情孔哀。侯爲掩面泣。下令如風雷。鳴金聲高振江上。指攜夫役如將將。老民提宮幼荷鉏。堵禦邪許走丁壯。須臾負土成城墉。巨簾小筏供保障。蛟龍戢角不敢前。陽侯卷旆不敢抗。十日雨沐兼風餐。捍衛田廬得無恙。無恙已欣戴二天。金錢滿船廉俸蠲。排門計口散摩肩。溼突破竈一一噓炊煙。仁人之政利實多。感人爲作救圩歌。願侯長涖茲土兮。召年豐而時和。

荊州述事詩

治水災事。十首選五

畢沉

渚宮重見小滄田。湘怨酸吟哀郢篇。慈筏津迷無彼岸。濫觴勢蹶竟滔天。不知骨化泥塗內。祇道身經降割前。此去江流分九派。魂歸何處識窮泉。

涼颿日暮暗淒其。棺鑿縱橫滿路歧。飢鼠伏倉餐腐粟。亂魚吹浪逐浮屍。神燈示現天開網。水患前數日江上有神燈來往。熄壤難埋地絕維。那料存亡關頃刻。萬家骨肉痛流離。

浪頭高壓望江樓。眷屬都羈水府囚。人鬼黃泉爭路出。蛟龍白日上城遊。悲哉極目秋爲氣。逝者傷心淚迸流。不是乘桴便升屋。此生始信卽浮漚。

手勅親封遣上公。勤民堂陛一心通。金錢內府催加賑。版築冬官記考工。直欲犀然窮罔象。肯教鵠結哭鴻濛。宵衣五夜批章奏。飢溺眞如一己同。

大工重議築方城。免使蚩氓祝癸庚。涼月千家嫠婦淚。清霜萬杵役夫聲。蟻生漸整新槐穴。虎旅重開舊柳營。我有孝侯三尺劍。誓將踏浪斬長鯨。

海嘯

祝德麟

縣城東門去海不百步。壬午七月十三日泊舟於此。天方旱。二更風雨大作。一晝夜未止。嘯聲震撼山谷。居民遷避入城。余舟繫纜桑本。明日視之。桑已沒其杪。舟子以篙量橋門。水漲一丈八尺。又明日乃定。

乾隆壬午秋七月。祝子省親返家室。維舟縣郭大東門。倒注銀河雨不歇。自昏達旦歷呖哺。瞥見城根堤岸沒。晚來海嘯更可畏。砰砰始始定何物。初疑六鼇翻身地極頽。又疑雷公失足天根摧。石頭路滑萬轂擊。昆陽城小千軍來。鼉龍憤怒窟宅徙。虎豹咆哮山崖開。陽侯拜。天吳舞。駭狀殊形不可數。伍胥前。文種後。江濤助勢挾奔走。赭龜搖動三疊掀。颶母來往揚旌旛。風聲潮聲亦不辨。但覺萬竅噫氣鬱勃無由宣。此時性命鴻毛輕。居民避災盡入城。我欲從之沒岸登。一點漂泊波心萍。世間何路平如砥。去家咫尺且遭此。隱隱天鼓空中鳴。五更餘怒猶未止。

飢婦歎

毛上良

天公扶滄海。洩入箕尾間。拏舟四十里。斷絕人與煙。仰看日色慘。俯訝地軸穿。蘆中聞哭聲。老婦牽一船。大兒膝下啼。小兒乳下眠。曰婦夫免乎。撈禾骨在田。曰婦兒免乎。肉飽蛟鼉鼃。昨聞鄰家尸。各各飄前村。一語千滴淚。哽咽氣不申。新婦病牀蓐。屋折霾風翻。伶仃兩黃口。粒絕衣無禪。牽衣死道上。魂魄還團圞。號咷拍短楫。哀鳴叫皇天。誰當叩閭闔。黔黎救深淵。

下河民

張鏐

去年雨苦少。今年雨苦多。春山無麥秋無禾。下河之民遷上河。上河水淺纔過腹。濁浪時時打人屋。小家賣兒女。大家賣黃犢。村村閉戶水中哭。食盡糲糠況饘粥。撐船入市何所睹。但見波光不見土。朝下雨。暮下雨。官府賑濟來。有米不能煮。

浙東大水行

秦瀛

黑風摧山怒蛟立。霹靂車纏電火急。其工頭觸不周傾。蹴起崩濤高百級。半空瓦石隨雲飛。千村萬戶無完扉。須臾赤子變蛙黽。嗟爾性命何其微。縣官登城城欲頽。水突城闕聲喧騰。城中居民上高阜。縣堂滾滾排天來。縣官下鄉喚鄉保。如行羅剎人蹟掃。四鄰雞犬寂無聲。窮谷惟聞惡鴟叫。婺州迤南連括州。到處俱有懷襄憂。路上死人不知數。殘骸掛樹如獼猴。死者已矣生更苦。寡妻哭夫子呼父。絕粒分作溝中瘠。身無短褐居無宇。我也聞之淚滂沱。五行沴氣乖天和。吾曹涼德據民上。民兮民兮奈若何。

河溢

凌廷堪

甲午八月十九日。鐵牛岸崩河水溢。黃流浩汗旬如雷。淮壩盡作蛟龍室。黑風吹水相鬪爭。濤聲撼天天爲驚。可憐黔天走無路。咄嗟人命鴻毛輕。傳說瀕淮百餘里。居民皆逐洪波徙。號呼望救聲入雲。富強登舟貧弱死。死者骨肉爲塵泥。生者俱上長淮堤。淮堤無米不得食。惟見日暮風淒淒。垂頭枵腹但枯坐。編葦棲身忍寒餓。溼薪爇釜冷不煙。婦子無聲淚交墮。作詩寄語淮之民。九重恫瘝同

一身。指日恩綸下天府。河堤使者加拊循。補偏救弊聖王政。坐令郛屋生陽春。

江北大水歎

陳文述

西北沂江源。東南竟江委。巴蜀積雪深。併作大江水。今年楚雨多。東下三千里。邗江入海處。處處堤岸毀。汪洋成巨浸。地水本相比。兼之潮汐盛。浩瀚不可止。屋廬與墳墓。在在水中沚。舟行不見岸。惟見樹梢耳。林鳥遠棲塔。海魚近入市。洑洞疑洪荒。人民可知矣。胥徒亟四出。恤之錢及米。紅船夾雙槽。渡人若渡蟻。貧家葬近岸。岸圯墳亦圯。上下隨波流。櫓檣相疊疊。捐金爲瘞埋。積棺若積几。子孫悉流亡。悲啼雜人鬼。老人八九旬。自言未見此。哀鴻徧中澤。耳目忍聞視。無德致災沴。責躬惟自矢。賑貸與蠲輸。次第行就理。更虞來年水。奔騰復如是。未雨須綢繆。修防何日始。更期種來甦。春熟聊救死。三復靡鹽詩。漚然獨揮涕。

雜吟

顧 蕊

雷霆怒擊蛟龍徙。九十州縣波濤裏。縱橫一片天模糊。桑乾水接滹沱水。數萬愁魂聚於此。二十餘日雨不止。天子悼歎民死亡。大吏飛章稱吉祥。

河邊築堤高數丈。蘆葦膠輻相依傍。邇種高粱兼雜蔬。胥吏導民民樂往。租不入官利可攘。土脈日疏水衝盪。民遭衝盪民自愚。昔飽胥吏今飽魚。

九重日念民疾苦。急遣重臣視三輔。鮮衣怒馬從天來。四望茫茫去何所。撲人況是風兼雨。回首歸來報聖主。如天之福民不殘。陳陳麥廩安如山。

設廠煮粥府撥銀。寧濫勿隘言如綸。仁風扇處人樂喜。達官富商咸指囷。飢黎騰喜使者瞋。禁之勿偕官賑陳。官賑給民憑紙易。一紙吏索小錢百。

哀新塔

查 揆

飢民走喫官廠粥。烏鳶下攫樹上肉。樹上者誰民之族。挂髮撐腸拄胸腹。去年水來高過屋。不死沈淵死喬木。其餘乃趨城西隅。城西隅有僧浮圖。紀年傳是吳赤烏。赤烏不見見水鳧。鬼燐熒熒白日通。怪風哀窸聞叫呼。舟人指謂予。庚申歲六月。其日二十四。是夕塔遂折。君不見圍圍塔下魚。纍纍道傍骨。

淮河歎

潘際雲

淮河四月風怒號。捲起白浪翻塘坳。老蛟噴沫天吳驕。一堤如線居民逃。夜半黑雲壓城濠。翻空白雨尤蕭騷。石岸迸裂流滔滔。河流漫溢十丈高。譬如弩箭離弓鞘。駛如萬馬相騰鏖。若如正練飛層霄。轟如礮車摧塵囂。魚龍灑灑遊平皋。哭聲殷天民居漂。峨峨高塔浸及腰。老樹露頂同蓬蒿。何況草舍依荒郊。流民蕩析容顏憔悴。攜妻抱子泥沒散。提筐乞食髮垂髻。夜半古廟懸簞瓢。見客流涕聲嚔嚔。爲言頻歲凶荒遭。去年首夏騰江潮。瀾瀾千里成銀濤。欲避無楫居無巢。中田徒種黍與苗。今年更值狂瀾洶。轉徙不復知昏朝。賣得子女供餽糟。我言朝廷沛恩膏。勅下少府頒錢刀。設糜散賑宣告條。繕修堤堰完且牢。招集流亡撫瘵凋。會看水涸秋冬交。爾其歸耕葺衡茅。吁嗟鴻雁毋嗷嗷。

開倉謠

胡敬

雨聲浪浪打屋瓦。高田水向低田瀉。浪浪晝夜無時休。低田水接高田流。田高田低水一片。農夫把鋤淚滿面。五日雨無麥。十日雨無禾。無麥食不足。無禾將奈何。縣官勘災下鄉里。里胥迎官踞田裏。道言多雨稼不傷。縣官聞言色爲喜。府符昨下來。火速催倉開。待開不開視鄰邑。各各顧望相遲挨。吁嗟乎。身家事大民命小。即使開倉吏中飽。明歲催科書上考。

題鄒鍾泉

鳴鶴

開封治水記略

林則徐

狂瀾橫決趨汴城。城中萬戶皆哭聲。孤城障水城垂傾。危哉公以赤手擎。是時在官同震驚。民謂非公吾不生。撫部牛公洞輿情。授公郡符安編氓。公所自信惟一誠。死守誓與陽侯爭。肝膽披瀝通幽明。億兆命重身家輕。禦水難於禦暴兵。四圍激颶鋒莫撓。城頭白日遊赤鯨。麗譙夜聽蛟鼉鳴。公親鑿鼓喧軍鉦。衣不解帶巡嚴更。始焉拳茭刈榛荆。繼下墻石聲訇訇。連旬苦雨不肯晴。上淋下潦溝澮盈。萬難之際彌專精。焚香告天心自盟。峭陂斜堰高崢嶸。逼走急溜開中泓。歷伏秋汛及霜清。寢食於城城可嬰。渡民避水舟筏迎。濟飢餽餽兼粥錫。全活老穉蘇鰥惸。是冬鳩工依定程。河由地中順軌行。奈何羣議紛縱橫。欲遷洛邑重經營。咄哉此論乘輿評。三語奚必同盤庚。斯城仍恃衆志成。汴民困久茲乃亨。

劉珊插秧詞。見田家門。

悲河決

王蔭槐

淮濱野人閉茅屋。夜枕啾啾聞鬼哭。起看流屍積滿淮。洶傳堤決黃河曲。蘭陽七月風怒號。如山捲起黃河濤。累卵之勢久所慮。百丈一落波天滔。蕩瀟陳留沒汝潁。哀哉十萬驚魂漂。我聞招信舟人女湖宿。撈得兒死在空櫝。懷中粗糲謂所遺。可憐尙望人收育。又聞阜陽漁人晨汲水。水中救得雙鬟起。泣言家世本清門。有兄赴試開封裏。夜半洪流沒滿村。倉皇託命車箱底。雖蒙拯死出波濤。滔滔何處存鄉里。吁嗟乎。天吳肆虐民何辜。我欲上排閭闔呼。君不見曹滑壕邊髑髏滿。往歲賊亂民遭屠。殘魂墮魄冤未散。天陰頸血汚模糊。豫州瘡痍猶在眼。那堪復此悲淪胥。方今聖人憂旰食。發帑屢下司農敕。保障誰能旦夕功。催輸恐盡東南力。日暮喧呼報急來。更驚袁浦防堤驛。湖波湧洞聲如雷。愁見妖星吐芒黑。

武義道中

吳文照

肩輿出城隅。山色輿前繞。春田犂确堆欲平。居民疏於樹頭鳥。去年秋七月。水決江之東。婺州八屬邑。武義尤當衝。雨聲如注江聲吼。波力撼山山欲走。可憐山下萬人家。雞犬無聲化烏有。高原老樹露鵲巢。下者盡宅龜鼉蛟。沿厓屋共流沙徙。蔽水屍如斷梗漂。春波轉眼流三月。漲痕消盡山原闊。夕陽破屋幾災黎。性命俱從魚腹奪。側聞大吏賢。封章達宸聽。散利與緩征。詔下拯民命。民命雖存家已空。歸來那不歎哀鴻。只有無知閒草木。春來依舊照人紅。

黃梅大水行

張維屏

東去連鄱湖。西來通蜀江。浩浩江湖間。波浪相衝撞。邑當吳楚交。其南卽潯陽。由春以及夏。恆雨

無時暘。陰霾壓四野。道路成陂塘。始慮損禾稼。未料傷堤防。何期雨不止。江漲非尋常。堤圩夜走報。水長三丈強。衝泥急奔赴。寢食不暇遑。濱江皆可虞。迎溜尤難塘。捐貲集畚築。千夫相扶匡。豈知盡人力。未克回天殃。一決數千尺。頃刻成汪洋。馮夷舞澎湃。魚鼈爭跳踉。富人預綢繆。舉室遷高岡。窮民無所之。結茅傍菰蔣。棚棲與露宿。藉草以爲牀。魂魄驚乍定。飢餓病欲僵。賤子愧邑宰。憂勞職所當。小舟犯駭浪。沿堤散乾糧。飛書報大吏。章奏陳天閭。皇心廬赤子。恩膏逮窮氓。發帑拯彫瘵。蠲賦蘇痍瘡。大小四十員。治事誠周詳。至梅邑辦災。自方伯以下凡四十員。青蚨按戶口。白粲盈筐筐。災黎十八萬。庶幾免流亡。賤子筋力盡。艱苦躬備嘗。轉憶始涉險。堤潰水若狂。是時夜將半。月黑星無光。急流衝一葉。力挽逢枯椿。舟幸不破碎。死生判毫芒。余勘災。舟爲急水衝去。力抱枯木乃免溺。一身詎足惜。萬戶良可傷。比聞川漲盛。汎濫及湖湘。又聞江浙間。淫潦淹村莊。下流旣瀾漫。上流益縱橫。昔爲爽塏地。今亦卑溼鄉。天公憫黎庶。蛟鼈敢鴟張。所望千里流。早注百谷王。哀嗷雁澤聚。修築鳩工良。會看鼙鼓集。復見虹堤長。

雷鴨行

朱緒曾

癸巳秋。江水大漲。農田漫沒水中。有水鳥蔽日而飛。轟聲如雷。落田中。禾無子遺。村人謂之雷鴨。按羅願爾雅翼云。夜間有聲類暴雨。詢其眈。曰鳬鷖也。蔽天而來。必竭禾穗。是也。

白晝雷轟日光黑。合村面上無人色。老幼喧呼雷鴨來。枉矢陰弓驅不得。千百羣飛江之涯。陡驚風雨聲沙。須臾禾禿鴨未餓。東村霹靂西村去。

癸未大水行

王之佐

迎梅送梅何連綿。大雨廿日成漏天。天瓢翻時兼雨雹。窗櫺擊斷屋瓦穿。一宵海風又暴起。倒挾海潮怒不已。百年老樹拔其根。排牆又見橋梁圯。我家正在堰上村。礪碎白浪來打門。下牀淫淫水一尺。蛟龍入室驅雞豚。田禾盡沒苦營救。救之遠近鳴鉦喧。連朝堤岸復崩潰。老農無計空聲吞。我時登樓起四顧。平野茫茫失村路。陰霾翳空黑於霧。野樵漂來慘無數。我其魚乎益驚怖。朝不保暮草頭露。民力告疲賦緩輸。里正徒傳長官諭。可憐十室已九空。炊煙斷盡斜陽紅。兒女求鬻來市中。叱離乞食嗟奇窮。何人慷慨解施澤。大吏還宜籌善策。眼前火急請發棠。先慰災黎造災冊。

水災紀事圖詩

和王硯農之佐○硯農有紀癸未水災詩。見繪聲集。

蔣寶齡

朝呼雨晴。暮呼雨晴。晴鳩穀穀苦不靈。淙淙簷漏仍作聲。君不見鄰翁乞火涉水行。縣雨。

低田歎瀾瀾。高田半淹沒。屛水倒置車。咿啞晝連夕。溼雲屯空雨未歇。退不盈寸長一尺。踏車。

風吹雪浪狂作堆。前村後村圩岸頽。急流洶洶灌戶來。此時老農猝無計。釘竹爲防大非易。且脫門樞殺其勢。築壩。

貸錢買新秧。補種且努力。苗乎得早秀。償我十之一。補種。

雨淫未已又風暴。倒海翻江疾雷到。千年老木拔根起。疑有乖龍半空嘯。田塍盡與江湖通。海鄉木棉一掃空。君不見癸未七月二日風。千里以內無不同。風暴。

破船搖雨爭入城。告災曷能待雨晴。里正勿辭苦。先煩到官府。漂盡田禾難救補。須憫嗷嗷十萬